

四庫全書

集部

欽定四庫全書

學言稿卷五

元 吳當 撰

七言律詩

徐氏園亭

河山錦繡帝城中更闢名園在屋東  
滿地綠陰三月雨數聲黃鳥百花風  
軒楹有席漁樵對樽酒多情父老同  
逸興已無朝市夢相逢往往說年豐

送陳廷佐高州路教授

江州義門天下傳君今分教島雲邊百蠻俎豆先王學

列坐弦歌弟子員鸚鵡園林春似海秭歸

縣名屈原之鄉

風雨

夜如年宦情莫嘆徽班冷祿米分時蚌蛤田

送歸彥溫河西憲使

陽關東出接西涼皂蓋朱轡隴路長五郡人煙無堡塞

千村部落有牛羊休屠

音朽除匈奴王號

庭遠曾歸漢都尉城

荒尚護羗四海興圖真渾一祇將聲教答時康

送蘇伯脩由禮部侍郎赴淮東憲使

東曹禮樂竦朝端，忽奏皇華遣勇冠。  
五色文章金匱富，九天風露玉壺寒。  
江頭畫舫迎潮去，海上青山立馬看。  
二十四橋春似錦，飛花不到使君鞍。

看雲亭為慈谿匡上人賦

盤結松蘿四壁空，靜看雲影坐從容。  
風清時送歸巖鶴，雨散常依在鉢龍。  
野水滯潮微辨樹，山光斂暮只聞鐘。  
杖藜欲去分禪榻，知隔慈谿第幾重。

玉雪坡為周學士賦

曾識羅浮山下樹蒼茫白石共煙蘿幾年種玉雲千尺  
鎮日花開雪一坡酒熟谷中春事早詩成湖上月明多  
青綾夜向金鑾直踈影黃昏奈爾何

丘叅軍妻守節

紫髯不見舊叅軍桓表旌門墨色新雲雨幾時同穴夢  
冰霜百歲未亡身香奩有淚迷鸞影錦瑟無聲落燕塵  
萱草堂前今種柏翰林留記寫精神

保定王氏母九十得賜帛鄉人合燕為壽

皇家賜帛出郊圻王母光榮九十時  
仙露釀成千日酒春風來自萬年枝  
舊頒官誥從兒貴新製恩袍與體宜  
已是八荒開壽域城南咫尺接天墀

送畢氏子韶州訪翁李知事

蚤雨收嵐海氣涼隴船迎浪粵山長  
杜鵑亂叫楊梅熟鸚鵡低飛荔子香  
籌幙望雲依北極琴臺延月對東床  
宮岩石乳肥于玉服食應須遠寄將

賦梅竹軒寄太史楊公

湖上開軒接浪波，映堦梅竹更婆娑。  
潤留翠黛春雲合，寒入冰綃夜月多。  
嘉實可供調鼎餽，長竿終自伴漁蓑。  
清風三徑人如玉，越水吳山奈爾何。

送劉成德之京師

玉谿楊柳綠依依，新着丹袍陟帝畿。  
江上馬蹄春蹀躞，日邊龍角曉依微。  
禁墀香近神仙佩，御苑花開錦繡圍。  
亦欲乘槎問星使，祇愁老却故山薇。

題桐木韓氏族譜

韓家相業當時重盛德名昆集鳳池章珮並縣金錯落  
宣麻同拜玉淋漓梧桐春雨江南夢松柏秋風海內悲  
孫子尚餘宗譜在更傳遺事後人知

楊公明徐志可貽詩次韻荅之

几杖曾陪上玉京幾回聽漏酒初醒琳琅春盍朝天佩  
雲母時開迎御屏銀甕賜餘蓮子白金魚恩重荔枝青  
不才猶欲承先澤擣散何堪辱在庭



南州榻在長留客北海樽空未易醒臺館四時如錦繡  
雲霞長日作帷屏桃成秋實千年碧橘待霜肥萬顆青  
聞說臨池多逸興籠鵝時與換黃庭

宋蘄之廣濟簿尉黃剛中脩水人也至元天兵渡  
江中十九矢而死妻劉被掠子甫十歲既長求其  
母凡十年知己沒入官迎駕哀訴得旨使為母子  
如初

臨危百箭忠臣血流落孤蹤孝子心霜露年年秋草碧

關河處處暮雲深  
仰天已覺恩如海  
愛日常懷淚滿襟  
繼述好留青史傳  
淒涼更賦白頭吟

環青堂

黔南泉石盡煙霞  
幽曼偏宜隱者家  
四坐春山有秋色  
一川流水見桃花  
樵歌窈窕穿雲去  
眉黛嬋娟對日斜  
更說官閒松菊在  
芒鞋應許踏輕沙

翰林上直次周伯溫韻

宮庭白日靜相宜  
鈴索無聲謾自譏  
雲近簾櫳秋影薄

香飄殿閣晚風微典謨事業千年冊黼黻文章五色機  
每嘆小臣懷補報寸衷何計達宵衣

金鴨香分石鼎茶日長宮署寂無譁庭前草樹皆生意  
壁上丹青有歲華禁直夜涼初賜被講筵秋近又宣麻  
神光鬱鬱衝牛斗河漢層陰莫漫遮

史院秋祀三朝神御殿用鄭編脩韻

銀燭金蓮禁署深香飄秘殿碧沉沉鼎湖弓劍千年在  
黼座衣冠五夜臨簾外雨雲飛野鳥殿中燎火起巢禽

悲絲急管俱增感誰識朱顏白髮心

彥脩秘監作亭堦前栽竹一箇名一竿亭咸為賦詩  
公子孤標絕世奇亭前栽竹靜相宜蒼龍垂影雲千尺  
翠袖臨風玉一枝特標不隨春色改高情只許歲寒知  
江頭畱得扁舟在何日從君獨釣時

送達天山融州大守

五馬翩翩渡五溪玉融更在桂林西連山晴黛分巖洞  
列戍昏煙疊鼓鼙隴上梅花無雁過庭前榕葉有鶯啼使

君自是金閨彦暫為分憂及遠黎

宜春盤龍寺

巖峯三十六盤通塔殿高低翠谷中傳法有宗僧業白  
安身無語佛燈紅松杉種得雲千本泉瀑飛來雪半空  
最喜老龍泓下臥肯將霖雨致年豐

蓬軒

幽居軒檻越江邊鴻雁鳬鷺在目前春漲還如天上坐  
雪時渾是剡中船一枝梅月寒堪畫幾樹松濤夜不眠

總把平生湖海興斫魚釀酒賦詩篇

史館上直次王應奉韻

玉堂高迥不宜冬古木迴廊浩蕩風華蓋紫微天咫尺  
泰階黃道日當中捷書迅急時聞奏退食從容每自公  
衰晚腐儒何補報祇須制作示無窮

送遂善上海道萬戶

帥符新拜紫髯翁國饒深賢轉漕功海水八荒浮地軸  
雲帆萬斛動天風東吳民力今時困中土軍儲昔自充

報政歸朝叅大議經邦事業屬豪雄

筠庭

老屋城南倚翠屏蕭蕭脩竹滿前庭  
筍因夜雨侵苔長枝共春雲覆檻青  
深處石閒留客坐隔林鶯轉撫杯聽  
故人詩句應題徧藜杖何時一叩扃

次韻寄福建魏廉使

御溝冰泮水初流繡斧朱幡上綵舟  
北極關河真壯觀南州風物總離憂  
花明苑樹鶯聲曉楓落吳江鴈影秋

春注定知宣室召歸來應得從春遊

浮雲道院

道院孤高古翠微  
滿間山氣靜霏霏  
曉隨白鶴迎風出  
春共蒼龍作雨歸  
浮世紛華空在目  
閒情舒卷自忘機  
無端却上蓬萊住  
五色成章向日飛

雞山隱居

自是山深好隱居  
白雲千畝在庭除  
鳬飛每候仙人寫  
酒熟時停長者車  
春盡草根俱是藥  
秋來柿葉總堪書



舊家猿鶴多生怨久欲從君卜里閭

代祀過信州蒼巖貳守貽詩次韻以謝

羣飛凡羽見孤凰胸臆皆成五色章奕世公侯存故國  
先朝相業踵遺芳銀箏自度新調曲金鴨時焚舊賜香  
慚愧相逢即相別江東雲樹寸心長

上都秋日登眺

客裏年光似水流滿城砧杵動羈憂沙頭白露牛羊夕  
塞上黃雲鴻鴈秋千里關河通王氣兩都宮闕壯神州

多情不用悲搖落更為斜陽獨倚樓

環翠樓

碧梧翠竹倚孱顏故築層樓與客攀  
劍氣每留星漢上山光只在雨簾間  
娟娟曉日開眉黛鵲鵲春雲擁髻鬟  
便欲買舟江海去杖藜應許叩巖關

鰲峰石

鰲峰石在玉堂前近與蓬萊御閣連  
積潤出雲秋漠漠孤根承露夜娟娟  
土花剝盡生光怪海嶠移來閱歲年

良嶽遺墟歸草莽金題猶識舊時鐫

上官氏南樓

層軒百尺倚高秋蕭爽渾如庾亮樓雲影每依簾側畔  
溪聲只在樹東頭仙人巖石通霄漢太乙藜燈直斗牛  
總道登臨多雅興何時借鶴試相求

東安陳氏慕親堂

城外雲連郭隗臺草堂寂寞傍墳開碑銘有字人常讀  
宰樹成行手自栽雖雉春迎寒食出哺烏晴逐夕陽來

百年霜露無窮思  
擊筑酬歌總是哀

坦明堂

東南佳麗獨錢塘  
君向青郊結草堂  
焚曲雲山分野色  
滿池秋水納天光  
松陰落處琴書潤  
柳絮飛來枕簟涼  
衮衮京華塵土夢  
好因鱸膾踏吳航

戴宣使以差出建康因得過家

楊柳新條拂酒杯  
都門望望百花開  
元臣建國羅羣彥  
使者宣勞出上台  
雲路漸看華蓋逼  
鄉關初見錦衣回

卷五  
此行不為鱸魚膾莫待秋風擊棹來

李氏義聚堂

錦里堂成聚弟兄門門雍睦見儀型桑麻繞屋春千畝  
風雨連床夜六經折去荆花依舊紫種來慈竹鎮長青  
貽謀更有無窮感時向尊前賦鵲鵲

蕭閒外舍次許可用承旨韻

東郊結屋川光近內相題詩墨色新庭草常留青鹿臥  
渚雲惟許白鷗鄰傍簾種竹秋聲近帶石移花夕露勻

野馬塵埃渾不到蕭然門巷自家春

順存堂

龍泉江上卜幽居題扁當楣學士書堂下白花吹采鳳  
窓間錦瑟詠關雎猗蘭有態春雲近棣萼多情晝日舒  
朋酒升堂家慶在相看不樂更何如

至日和仲寶大學士韻

御宸當陽扇影回樂聲齊起殿前雷行天黃道常依日  
報國丹心未許灰金錫衮衣歸黼黻瓊樓玉宇尚崔嵬

謝安再為蒼生起調化真宜法斗魁

墨梅

粲粲冰肌雪未暎蕭蕭疎影寫黃昏情深西子湖邊樹  
夢入羅浮月下村萬斛春光歸筆力一枝雲氣沁香魂  
清江寂寞楊丞遠無限風流此日存

黃隱士相過次韻

吾家華蓋鬱嵯峨數畝蓬茅長薜蘿愧我非才宜隱退  
知君有道幸相過風清杖屨迎嵐出春盡犁鋤帶雨歌

架上有書尊有酒相逢不樂又如何

和虞先生壽京師賈姑詩韻

慈顏九袞髮如鴟世族前朝宰相家天近縣官時賜帛  
春深孫子日扶車麻姑酒是長生藥阿母桃應幾度花  
學士詩成無限思五千里外望京華

送陳道士奉香歸四明

暖煙芳草路迢迢又送天香下九霄洞口桃花春欲笑  
山頭桂樹晚難招麻姑酒榼藏丹室徐福樓船駕海潮



何日乘桴遠相問詎應無地老漁樵

聽雨堂

兄弟多情有別離昔年惆悵大蘇詩青山聽雨相思處  
白日看雲獨坐時慈竹繞簷春瑟瑟梧桐當戶夜遲遲  
投簪未覺歸來晚盡散囊金對酒卮

強仲賢赴廣東師帥幙

元戎分閫握兵符籌畫須君答廟謨千里車來天北極  
五羊城在海東隅香雲荔子丹砂顆清露芙蓉錦繡圖

早立勲名重邦國莫令妖氣傍江湖

九日燕南禁酒簡趙子威僉憲

又與黃花負夙期天南霜露滿人衣酒尊有禁逢佳節  
紗帽無情對落暉俯聽秋聲從樹起仰看雲影送鴻飛  
登臨不用增惆悵咫尺承恩上紫微

燕南龍興寺閣晚眺

倚天樓閣貯金仙層棟猶題趙宋年混一南方今宇宙  
英雄百戰舊山川魚龍水落秋江外芻牧人歸夕照邊

總為悲歌生慷慨憑闌極目思淒然

關西道士求賦雪巢

一間素壁倚秋風却擬巢林雪半空鍊得身形清似鶴  
望來劒氣白于虹洞簫窅窅留雲住牖戶綢繆許月通  
更識船如天上坐孤飛只合剡溪中

上巳日次韻

憶昨追隨苑外車風光九市見紛奢并兒玉帶雙龍佩  
燕女金袍五鳳花天樂聲高仙仗肅宸旌影動禁林賒

當時講席尊諸老人到于今喜誦夸

歐陽建寅赴松江巡檢

京華久客宦情微身到江南即是歸  
虎士刺船迎邏鼓  
鮫人停杼望雲扉  
薰葭夜月風連海  
杭稌春雲水繞圍  
自笑白頭猶戀闕何時五馬借光輝

次趙伯友韻

白髮衰翁怜病久青春遊子嘆歸遲  
感君曾奏匡衡疏  
懷國長吟杜甫詩  
蒼海魚龍仍衮衮  
孤城花柳自熙熙

千年遺恨同誰語百世高情與爾期

百年道脈細於絲長夜漫漫待旦遲  
先進常從周禮樂專門仍授漢書詩  
微躬獨步思繩武大介重光仰緝熙  
已忍淒涼成病久寸誠惟與古人期

遊西湖承天寺贈月潭上人

中天臺閣禁城西春日遊人出御堤  
滿地落花馴鹿臥千條弱柳亂鶯啼  
窻涵水影金鏞淨旛倚晴雲絳節齊  
最喜上人能愛客乘船仍約酒頻攜

宋樞密權公葬婺源之麓八世孫居都昌者作樓  
以望其丘隴于千里之外名曰寓思虞學士嘗為  
賦詩今樓已廢矣九世孫緝來求余詩賦此

異鄉丘隴近蓬萊層構當年望眼開千里江山遺刻在  
百年霜露遠孫來已無化鶴歸華表空有饑烏下碧苔  
寂寞孝思何所寓斷雲衰草兩堪哀

九日紫極宮次戴懋和韻

老去孟慳易勸酬年年揮淚望神州鳳凰城闕金湯在

龍虎亭臺翠輦遊牛斗寒光通紫極蓬萊弱水隔玄洲  
烏紗不受西風急高閣凭江倚素秋

憶昨追遊禁苑寒隴頭紅葉醉中看青蒲曾伏麒麟殿  
白髮能勝獬豸冠天上玉堂惟有夢田間瓦缶竟無權  
殊方久病悲搖落笑啜茱萸強自寬

次韻寄康宗武

一自承恩乞鑑湖幾回清夢謁神都蒲萄天馬窮邊徼  
秔稻雲帆轉越吳陽谷吠晨驚蜀犬神祠鳴夜詫城狐

隆中高臥空籌策萬里雲霄羽翮孤

燕處會靈宮次姜步憲韻

江上煙嵐接地陰仙家庭宇自雲林玉堂金馬成塵夢  
草服黃冠稱野心滄海魚龍秋水落瑤臺風露夜寒深  
肯從世外尋丹訣何事人間嘆陸沉

移床

九月十日

伏枕移床入小舟江頭漁父問何由風濤接棹魚龍冷  
煙草迷津鴈鷺秋往事幾年誰內顧狂瀾百折自東流



草玄不守揚雄宅垂白空添宋玉愁

九江冬至日

愁坐孤城對日長  
葭灰動處識微陽  
八方雲物瞻新候  
幾樹梅花憶故鄉  
黃道春回天北陸  
紫煙時想殿中央  
頻年鳳歷催頒朔  
曾挿金貂侍玉皇

次韻示從學

東度關山馬跡長  
南浮江海鴈隨陽  
丹書玉篆發天語  
金節繡衣辭帝鄉  
放臣泣血竟何益  
羈客哀吟殊未央

故園雲谷雜豺虎寒木何枝依鳳凰

高昌喜山近仁在江州為太常院使禮部尚書新  
其堂構各有名扁為賦三題餘未暇也

江上小堂仍種竹渾如一棹住江間芙蓉秋水三千頃  
翠黛春雲十二鬟鳳管制來新譜在漁竿留得釣絲閒  
牧羊庭遠寒無樹裘馬輕肥客未還

右筠艘

冥鷗化翮向南飛棲息安危各有時秋入梧桐晴影薄  
寒通牖戶曉光遲青山是處瞻龍氣紫閣何年覩鳳儀

自嘆蓬萊常五色上林曾宿最高枝

右雲巢

飛花如席拂廬低不辨行蹤徑已迷  
竟夕有書分戶映幾年無榻見巖棲  
秦關擁道難容馬漢節禁寒尚牧羝  
曾憶釣蓑歸舊隱洞天高與白雲齊

右雪洞

九江雜詠書懷

百年頭上着烏紗一日江邊踏釣槎  
病似相如空有賦貧於杜甫更無家  
漁竿處處薰葭月樵笛村村躑躅花  
舊業已隨兵燹盡青門擬學邵平瓜

天地無情淚眼枯故園松菊久荒蕪  
秋風茅屋從誰葺春日村醪只自沽  
萬里關河迷宇宙孤舟煙雨滿江湖  
渥洼老骨空相顧雲漢高飛不易呼

冬至後九日

繡牕添線瑣浮灰玉燭迎陽晷影迴  
鴈度關河隨朔氣龍依江海蟄神雷  
漸開柳眼窺春色未放梅腮送酒盃  
藥裏書籤隨處有鄉心歲事漫相催

次韻寄友

暘谷東飛陸海灰靈杓北顧帝車迴波濤寒湧江間月  
草木春移地底雷九奏鈞天猶夢樂十洲弱水不勝盃  
山樓笳鼓時時急晏歲冰霜日日催

幾年野燒著寒灰此日樓船向海迴萬疊雲烟秋似黛  
一江風浪夜如雷歌殘玉樹浮空棹夢入金莖渴露盃  
想待上林花未發春光應得鼓聲催

立春日

年年此日客殊方誰擬今年住九江花鳥春愁詩漫興

乾坤元氣酒難降  
鄉心華蓋雲千里  
病目匡廬雪一窓  
到處青山薇可食  
老來何必淚雙雙

除夕有感

漁竿長在楚天涯  
龍節虛隨漢使槎  
世路風塵迷杞棘  
故園煙雨憶桑麻  
兩行淚對椒盤酒  
一樹春生蠟炬花  
人事鄉書俱寂寞  
不堪江上鼓頻撾

華蓋芙蓉翠倚天  
高堂綵服憶長年  
家人共守迎春酒  
童穉爭分壓歲錢  
香霧煖浮金鴨動  
蠟虹姓隔絳紗然

鶴書一去無消息白髮滄江對雪眠

辛丑元日夜坐試筆

扶桑曉色壓春雲江上香鑪留夕曛坐來白日有佳興  
雪後青山無垢氛蟄龍三冬成久臥鳴鳥百年今不聞  
遺經獨在共誰語太乙吹藜來夜分

贈聶克敬兼簡宗武

歲晏匡廬積雪深高松老鶴苦能禁海塵杳杳生春態  
江水沄沄流夕陰無事庾樓留客賦向來梁甫為誰吟

漁樵舊侶如相問  
鷗鷺寒盟尚可尋

夜月

處處關山淚眼明  
悲笳又送斷腸聲  
芙蓉水冷秋無際  
烏鵲枝寒夜屢驚  
黃道帝車還北極  
紫垣天駟接南瀛  
多情不用悲搖落  
萬里江波月夕清

七夕大風

江頭風急客衣涼  
瓜果誰家月滿堂  
五色在天曾補袞  
七襄報日不成章  
機絲停杼空成緒  
星漢乘槎竟杳茫



自嘆紅顏今白髮人間養拙更何鄉

次韻荅權緯

江湖波浪接鷗溟牛斗光寒動客星  
蘭芷風暄誰結佩芙蓉水冷自揚舲  
周官禮樂先王度漢代文章後世型  
衰病獨憐頭盡白故人相見眼終青

賦樊氏茅屋

聞君茅屋住樊川水影山光接几筵  
花徑約來尋酒伴柴門繫着釣魚船  
晴簷興在從誰賦秋樹高風只自編

亦有數椽華蓋下杖藜何日白雲邊

贈劉懋觀寫真

蕭蕭霜鬢隔風塵却有劉郎為寫真  
金馬玉堂成昔夢蒼松白鶴伴閒身  
傷心南土衣冠少極目中天日月新  
更許蘇卿老歸國便應黃閣畫麒麟

送人之西澗山長

巍巍宮廟澗之西松檜蕭森夾殿齊  
白屋衣冠存伏臘青雲步武見階梯  
江湖夜月寒驚棹桃李春陰雨滿蹊

昭代急賢無枉路未應重席嘆羈栖

老士安治書為使江東時嘗構叅雲亭在京師屬  
賦之

叅雲亭在宛溪頭持斧仙翁昔所遊日月星辰天北極  
山川草木地南洲門前車騎秋來好竹上題詩醉後留  
回首江村烟樹闊至今猶憶舊風流

玉堂公宴次周學士韻

扈蹕新隨帝輦迴賓筵秩秩玉堂開禁廬下直辭天仗

內使傳宣送御醕舞女分行花影動歌工閒奏鼓聲催  
衰年感遇慚無補賴有諸公濟世才

馮氏藏書堂

喬木依堂數畝陰買書不惜散黃金簡編總許儒生讀  
碑帖還從墨客臨芸閣牙籤晴睽睽練囊螢火夜沉沉  
只今許下多賢士始信君侯惠澤深

鄧汝貞買妾得子南歸雲林

雲林三十六峯齊獨振京塵向舊栖天上桃花新結子

水邊楊柳已生稊  
濁醪對客秋三徑  
啼鳥催人雨一犁  
亦欲投簪江上去  
為君移棹過金谿

贈日本詩僧

偶來金闕信相從  
笑指扶桑浴日紅  
處處寫詩楊海嶼  
時時飛錫振天風  
歸雲每共經函在  
行橐常因酒醖空  
吾道獲麟惟掩涕  
乘桴相問有誰同

次韻荅康宗武胡伯文

百年勲業鬢星星  
又聽流鶯綠滿庭  
茶與仙人分石鼎

酒從豪客索銀瓶一犁春雨蘇公圃半曲湖光孺子亭  
更肯煙霞空寂寞未應塵土嘆飄零

留巖峯寺

扁舟飄泊苦西東此日棲遲野寺中嵐氣常疑廬嶽雨  
秋聲還似大江風輞川花木圖猶在杜曲茅茨賦未工  
人事蕭條鄉土近幾時回首白雲通

巖谷風多秋葉飄一徑荒草涼蕭蕭已無幽芳媚野色  
惟有老樹存高標青山冉冉列鬟黛白日往往逢漁樵

仰天長嘆竟何補荷蓀長歌誰可招

次韻寄鄉友

傷心一視天無外病目長懷日再中獵騎合祛雲夢澤  
樓船直駕海潮風二儀高下悲人力萬類枯榮識化工  
衰晚祇慚何報補艱危終不擬窮通

風塵冉冉似蓬飄猶有衡門擁艾蕭錦里幾家紅葉樹  
華峯千仞碧雲標曉因童子坡頭牧夕約鄰翁谷底樵  
秋月春花隨地有歸來莫待楚辭招

南溪精舍

前代遺墟瀏水上南溪棟宇見新題  
開山種藥雲千本  
傍舍移秧雨一犁  
白鶴時從簷下宿  
黃鶯只在竹間啼  
尚方近覺聲華起  
却向金門聽曉雞

挽余忠宣公

沔陽舟楫勢如飛  
安慶孤城屹不支  
諸葛智謀天地閱  
杲卿忠義鬼神知  
縱然身活到今日  
未必人生無死期  
一片精忠元不改  
男兒到此是男兒



學言稿卷五

欽定四庫全書

學言稿卷六

元 吳當 撰

五言絕句

題古木

鍊石皆生色  
冰霜有歲華  
春雷龍啓蟄  
星漢客乘槎

天台玉漢橋道院八詠

玉谿橋

玉溪浮采鷁金鎖貫晴虹自是知津者能成利涉功

積果堂

幾樹棗如瓜千年桃始華渠通滄海水門倚赤城霞

十二區

揀地循環種名花取次開歲春何待塢按律且啣盃

梅竹莊

天香生玉樹雲影動琅玕對酒驚春事開門識歲寒

緝雲亭

琴罷月生渚鶴歸松滿坡葺亭無戶牖應是白雲多

招隱亭

書從北闕上文自北山移樵牧俱生怨耕鋤已過時

淵泉亭

秀出千黛螺飛來半空雪天光淨淙淙秋聲來淅淅

外墅

山光分遠近雲氣異朝晡過客俱能賦開軒即是圖

秋山山景圖

茅屋倚秋樹山樓延夕曛  
流來橋下水半是洞中雲

漉酒圖

頭上巾堪脫尊中酒不空  
衡門松菊在歸臥北窓風

畫龍

天用莫如龍淵潛閔神功一朝起  
平陸八表皆雷風

梅月窓

曾到西湖上聞香不見梅  
推窓窺月色竹外一枝開

七言絕句

青山絕處樓扁

中天隱隱碧芙蓉樓閣深藏第幾重松葉滿山行迹少  
樵夫聽得講時鐘

赤壁賦畫圖

水落江潭月滿汀秋光一色漾空青長歌窈窕吹簫者  
祇許飛來白鶴聽

水芙蓉

絳綃新製舞衣裳翠蓋亭亭度晚香祇恐君王恩易改

夜深風露不勝涼

畫紅梅

西湖月淡彩雲飛  
睡臉生霞酒力微  
誰道玉樓寒起粟  
顰脂却染素娥衣

王繼學賦柳枝詞十首書于省壁至正十有三年  
扈蹕灤陽左司諸公同追次其韻

灤陽楊柳長新枝  
無奈春寒力不支  
燕子歸來風漸軟  
却似宮腰學舞時

曉來嵐氣不成霜  
雲添煙籠萬縷長  
醉歸誰敢爭馳道  
盡與君王控馬韁

樹繞離宮草共青  
樹底旌旗朝露零  
宮娥起伺羊車過  
林梢斜月照華星

宮柳添來幾百株  
誰復天邊種白榆  
馬上貴人通國字  
時折新條作筆書

神京高寒春力微  
晴絮飛時花尚稀  
忽憶錢塘斜日岸  
簫鼓畫船扶醉歸



隴頭春深未識花  
酒帘動處是誰家  
郎來莫折門前柳  
昨夜東風初長芽

新賜金鞍選日騎  
玉釵斜挿兩鬟垂  
長條拂着珍珠帽  
只許東風細細吹

江頭樵牧昔年逢  
結茅臨竹更依松  
柳條繫得漁船住  
長日醉眠誰問儂

綠陰芳草思淒淒  
六宮傳蠟煖烟迷  
沙堤不種隋家樹  
誰憶曲中烏夜啼

貂帽駝裘休嘆儂從官車騎莫從容柳花飛盡雪花起  
纔見西風又似冬

潘子華畫上都花鳥

冰泮東風鳥力微暖雲將雨濕芳菲不知天上寒多少  
誰剪春羅作舞衣

觀弈圖

仙人棋局靜忘機松下靈芝似玉肥樵客歸時柯已爛  
雲間誰製芟荷衣

聞桂道人

八月天香滿界飄  
廣寒宮外影蕭蕭  
不從玉兔求殘藥  
却與雲山伴寂寥

掀篷圖

清江楊丞天下奇  
每能拈筆寫橫枝  
暗香疎影黃昏後  
曾憶掀篷對月時

送人歸清江省親

遠樹驚寒線在衣  
西風吹雪作花飛  
清江碧嶂秋光裏

不為鱸魚也合歸

大駕南歸至龍虎臺迎候者皆于昌平胄監歲館  
舊縣何氏至正九年八月監丞吳當獨來館人持  
祭酒司業舊題索賦

當關龍虎擁層臺此地年年翠輦迴八月千官瞻候日  
舊陪詞館小臣來

爾家門巷自清幽新闢軒窗許客留北望居庸天咫尺  
白雲紅樹倚高秋

贈淮南屯府從事

長淮木落正紛紛  
從事銜書逐鴈羣  
八月江寒魚似玉  
列屯秋淨稻如雲

挾彈圖

平沙淺草雨初乾  
時見飛花到馬鞍  
花樹止留巢鳳鳥  
王孫何處試金丸

雲林亭

幽亭古木淨蕭蕭  
江月雲山遠莫招  
昨夜西風吹夢去

共誰相對說漁樵

宣和鷓鴣

九重拈筆寫清秋  
草底微禽亦見收  
回首故宮花石外  
離離禾黍不勝憂

孫氏孝義

倚廬常近墓人家  
種樹留巢返哺鴉  
門外桑麻春幾頃  
東風開遍紫荊花

攜琴圖

偶因秋興攜琴去古木蒼藤何處村行過溪橋山路合  
白雲千畝不知門

蔡氏藏先世誥勅

無復前朝舊典型百年文物盡凋零蔡家孫子風流在  
愛惜黃麻似六經

息齋竹月

蒼龍翻石濕雲交鳴玉參差出鳳巢翠黛曉涼香袖薄  
一鈎纖月在林梢

贈墨工侯務本次虞學士韻

御床玄壁進龍香  
奎閣當年詫豫章  
此日侯家新製作  
采烟凝液總仙方

窓下雲英透紙香  
白頭慚愧戀文章  
玉堂天上成春夢  
珍賜何時出尚方

畫鶴

雲漠寥寥雪羽毛  
海風吹月倚秋高  
石田瑤草俱情思  
時見臨池一吮毫



覓盆梅

病中猶未見梅花何日堯夫駕小車為覓小盆分少樹  
東風如到野人家

竹枝詞和歌韻自扈蹕上都自沙嶺至灤京所作  
沙嶺風清宿雨多白雲如雪夜陂陀澗泉十里九曲折  
北向天邊作御河

雨過平沙不滌泥綵索凌風御帳齊宮臣報道曉寒淺  
有箇黃鸝深樹啼

宮車調得馬蹄勻  
細草輕風不動塵  
織成翠羽垂珠幙  
縷就黃金結繡茵

露下穹廬暑氣蘇  
臥看織女映黃姑  
山泉響似江南雨  
林下不聞啼鷓鴣

馬羣彌野草連雲  
當年玉帳度秋春  
迎日捷書頻送喜  
內間賜與出金銀

羽獵長年從翠華  
麋鹿生茸草茁芽  
射得黃羊充內饌  
更喜江南新貢茶

果熟冰盤進御黃秘殿揮毫對日長元臣補衮應無闕  
新賜宮衣自上方

殿頭雲氣盡成龍水晶簾影散高春阿母傳盃池上宴  
帝子吹簫月下逢

霓旌移仗藥珠宮雲母屏門不隔風花外侍臣成久立  
聽得新歌樂意同

青宮受寶朝賀日次韻

百年文物際重熙麗日祥雲晝刻遲上相傳宣催草詔

看君落筆玉堂時

殿外霓旌漾曉暉  
爐煙浮動袞衣瑋  
樓貝闕天中起  
五色雲霞在翠微

天樂聲中舞序陳  
千官花外駐車輪  
春宮初試黃麾仗  
寶蓋珠幡隊隊新

綠樹重重秘殿陰  
畫堂甲觀九重深  
青宮昨夜初承詔  
丹扆今朝又進箴

日出蒼龍紫霧開  
金門宣赦近臣來  
書條字字皆寬大

萬姓懽聲動地雷

大安高閣正當中  
龍虎旌旗衛兩宮  
近日春坊誰輔導  
相君班序冠三公

禁直周廬接上台  
銀河秋傍紫垣來  
為郎莫笑馮唐老

立馬金門待曉開

時以禮部郎中在上宮

宮臣侍側近爐熏  
衣上龍乘五繡雲  
鳴玉鍔金俱鼎食  
早思偃武與修文

殿閣薰風奏舜絃  
大明宮樹不疑烟  
聖人恭默惟思治

日厯憑誰細細編

深宮無處不開花  
玉燭調陽運帝車  
不是人間春易老  
風光長只在天家

自然亭

盤結松蘿覆頂青  
雲山四面作幃屏  
秋風棋局無人看  
夜月琴聲有鶴聽

九月十日出城

病耄猶知發出狂  
臥嗔惡少強移床  
丈夫死義無悲淚

市上傍觀為兩行

出湖

鴻鴈聲低日已晡  
扁舟渺渺出平湖  
何時却為鱸魚膾  
寫作寒江獨釣圖

十六日舁床入城

舟子舁床入市廛  
病軀仰面看青天  
不知城郭還何似  
聽得行人嘆昔年

謾成

豫章城裏聽秋風却向匡廬去住冬白髮數行非俗骨  
青山千仞有雲松

十洲麒麟落江湖遺老相逢說舊都春日瓊林看錫宴  
天門金榜聽傳臚

昔年策士奏題名西內傳宣御仗迎金織承筐懷舊賜  
白頭何以荅昇平

戰骨生塵塞草長將軍已拜右賢王節旄落盡蘇卿老  
渤海沙飛尚牧羊



霜月橫空鴈不眠  
夜寒邊燧尚傳煙  
傷心江上垂綸客  
不為鱸魚繫釣船

雜詠

江頭雄鎖控東西  
長嘆忠臣效節時  
滿目山川天險在  
不將版輿慮安危

忠臣

謂太守  
李黼

萬里江淮接楚舒  
連雲樓櫓見儲胥  
睢陽不獨張巡死  
汗簡應留太史書

憲使儲布哈守楚元帥余闕守舒

萬方海宇一封疆  
郡邑胥豪玩憲章  
寂寞荒城今第宅  
家家故牘滿新牆

敗葦蕭蕭故壘秋  
江山如畫一漁舟  
怪來不起臨濠興  
病久愁深淚易流

廬嶽層層聳碧空  
仙巖佛塔白雲通  
幾多樓閣青紅地  
盡在寒烟野蔓中

詠懷

昔賢講道秩賓筵五老香爐藹紫烟前代衣冠今寂寂  
故溪風月自年年

先子講道濂溪書院今四十餘年

關雎麟趾久無聲誰共周官識治平獨抱遺經身已老  
空山落月夢魂驚

江頭風月夜蕭蕭旅館寒燈共寂寥三月病來忘肉味  
九天清夜聽簫韶

春雨黃精似玉肥東風漠漠紫山薇飢來白石還堪煮

自嘆時人服食稀

柳外郊墟舊戰場寒蕪秋燐暮雲黃漸看三月鶯花裡  
陌上新苗隴上桑

先忌日

雲谷煙村事事非鳬飛不到鴈來稀楸梧幾個人千里  
不獨今朝淚滿衣

觀大明殿圖

大明宮闕五雲端簪筆趨朝老從官白髮十年江海外

人間寫作畫圖看

讀史

周業凌遲伯失宗紛紛功利起衡從時君不識真王佐  
卿祿寧辭十萬鍾

牛酒爭迎暴已除沛中屠販漫高車鴻溝更舉真籌策  
圯上功成一卷書

受命趨關定約時鄭翁多算竟何為可憐空碎鴻門玉  
天下雄雌亦易知

滅仇報主已成功還定三秦衆策同西楚能存韓社稷  
赤松無迹到關中

四海為家辨本支大封同姓奠邦基留侯漫使儲君固  
遺毒無端及愛兒

女禍幾令社稷危安劉一語已先知良平無術強根本  
功在諸君左袒時

盖世功名意氣雄楚齊國大勢難容從容進退知天道  
一邑封留事赤松

先漢雄詞後世無子雲學業冠西都大醇難掩終身玷  
直筆淒涼莽大夫

草罷玄經雪滿頭美新興頌不深謀千年遺恨曾投閣  
金谷何人肯墜樓

桐江波上有漁蓑東漢流風節義多大器已移名獨在  
猶將公論作干戈

九夷辟地識遺賢白帽端居木榻穿卓行至今推有道  
建安詞藻漫流傳

天自西傾水自東三分割據識英雄仲謀有子曹郎在  
蓋世功名僅漢中

一方僻險控孫曹兵術相疑治道高尚父鷹揚身未死  
詎應典午得稱豪

六朝才氣苦厭厭歸去辭高義獨嚴憂世樂天真有道  
千年處士晉陶潛

禮樂

東帛難招魯兩生奉常綿蕞亂縱橫滿朝將相輕年少



治道難因禮樂行

倫紀無章古道昏  
哇聲亂耳詎堪論  
千年不覩真儒效  
空憶河間禮樂存

連旬大雪

瘦骨稜層病未安  
江天風雪夜漫漫  
布衾鐵石渾無寐  
難得梅花入夢看

平施翠壑與丹崖  
風磴雲門處處埋  
直待東風花盡發  
却尋布韉踏青鞋

可嘆

忠義曾書宋兩都一時直筆共描摹萬方順逆蒼天在  
遺臭難稱莽大夫

漢水生波郡邑墟空傳楚魄葬江魚前年節鉞秋江上  
滿紙衿袵逐客書

碧桃紅杏艷陽天禮聘相期舉按賢腸斷關河時聽鴈  
琵琶却在賣茶船

謾題

上林高處鳳凰栖羽翮垂雲五色輝黃竹雪深梧影落  
山雞臨水焰毛衣

日出扶桑海不驚曾將巨釣掣鯢鯨一蓑回首秋江上  
臥聽蘭苔翡翠鳴

香爐峰色白巉巖黃獨無苗雪滿鏡燕子經年江上別  
東風回首聽呢喃

五老峯

五老峯前雪未消烟嵐深處夕陽撓沽來尊酒尋梅樹

釣得江魚上柳條

立春日感舊

南樓譙鼓北樓鐘樓外泥牛綵仗叢黃道泰階春浩蕩  
蒼龍觀闕曉瞳眈

麒麟烟樹鳳凰毛列侍趨朝禮獨勞中使傳宣排內宴  
御園春動樂聲高

春盤生菜翠如絲內賜金旂映白髭前度桃花何處去  
故園花草不勝思

金匱石室書  
卷六  
照眼榴花酒入唇愁顏衰鬢又逢春御溝冰泮河魚美  
惆悵江波有釣綸

春思

虎迹煙村少室墟羊腸塵路太行車上林應射春歸羽  
江海累臣有帛書

除夕

幾年別却帝城雉種樹書傳郭橐駝華蓋芙蓉秋色裡  
釣竿猶伴舊時蓑

與同館戲續前韻

東驅海若百年讎  
尚度龍沙幾兩駝  
春雨莘郊留負耒  
秋風渭水起漁蓑

燕歌趙舞國人讎  
塞下牛羊塞上駝  
煙草隨營飛獵騎  
氊城無地掛耕蓑

紫髯都護氣降讎  
姬妾氊車索載駝  
馬捐濃於燕市酒  
貂裘多似野人蓑

金目橫戈夜進讎  
錦幪負轂曉鳴駝  
燈前盡理朝天佩

林下誰縫釣雪裘

儀鳳青娥雜戲雛  
肉峯翠釜薦珍駝  
碧桃天上雲千樹  
白髮江頭雪一蓑

未踏猖狂舉世雛  
長安紫陌望銅駝  
陶公門外猶存菊  
嚴子灘前不解蓑

塵眼爭看楚俗雛  
書燈獨對漢時駝  
歌聲無復漁家傲  
處處金章換綠蓑

赤子妖成絳幘雛  
皇都塵接紫關駝  
故人風雪誰聯騎

野老江湖獨擁蓑

蠻隸橫過絕類讎  
海艘任載豈煩駝  
杜鵑花外春連屋  
布谷聲中雨一蓑

夢登書閣

匡廬晴雪自噴岿  
萬里清江一棹寒  
自笑老來情思別  
九天樓閣夢中看

詠歸

看雲不用買山錢  
帶雨宜翻種秫田  
白髮數莖非故態



青山何日是歸年

荷花香裏白鷗飛  
綠樹濃陰拂石磯  
一枕清風長夏簟  
雲邊何日釣船歸

稻畦黃處樹多紅  
山色嵐光紫翠通  
茅屋數間流水外  
一絲何日對秋風

蒼松翠竹映溪沙  
溪上寒梅樹樹花  
十月甕頭春酒熟  
杖藜何日到山家

講儀

山城馬足動紅塵  
雜沓晨趨服色新  
綿蕞草儀誰所具  
傷心半是大廷臣

長生院作壽

蓬萊雲氣合從龍  
腸斷關山幾萬重  
水落城空山未曉  
長生院裏鼓逢逢

天秩民彝不可磨  
傷心蟻穴與蜂窠  
無端紫綬紅塵裏  
猶說先朝第幾科

李節婦田氏

仙李移根雨露邊，青春江漢共風煙。  
千年事往蟠桃熟，黃竹歌傳阿母筵。

綠鬢飛蓬四歲兒，寒機對月夜眠遲。  
碧梧翠竹春雲合，斜日慈烏返哺時。

江上鶯花滿目春，冰霜皎皎百年身。  
自從破鏡留孤影，錦瑟無聲落燕塵。

朋酒升堂着舞衣，忘憂草色動春暉。  
貽謀曾授三遷教，斷縷猶存舊織機。

廉恥風移士節隳  
壺儀猶足正民彝  
世情無限傷心地  
惆悵琵琶掩面時

中秋對月口號

古木昏鴉接翅飛  
扶桑顧兔倍光輝  
廣寒夢到嫦娥殿  
新剪紅霓製舞衣

靜聽新人笑語聲  
天寒翠袖若為情  
舉頭不辨山河影  
坐看兒童闔眼明

豫章城頭百尺樓  
三年明鏡照人愁  
五老峯前秋色裡

寸心折盡大刀頭

歸舟湖中夢至上都

歸舟日日向南風  
積雨初收浪拍空  
夢入龍岡清暑地  
夜涼萬斛水晶宮

八月二十四日

丑夜城頭烈焰紅  
數聲笳起戍樓空  
江山如舊豪華去  
無食無衣一病翁

宣聖廟

百年如見魯靈光一炬堪憐瓦礫場秋水滿池門獨在  
古槐依舊帶斜陽

丑月六日見迫趨昇抗論力爭復繫于小舟龍開  
河口累夕驚風怒濤中六日夜至十有二日大雪  
泛凍病臥賦此

長夜漫漫雪一蓬有衾如鏤臥如弓害中猶擁胡姬暖  
未信當年屬國窮

曾憶黃河守凍船魚肥肉美酒如泉半生辛苦成何事

衰病飢寒雪裏眠

朱磯除夕


駭浪驚風動楚天  
鄉心羈思漫年年  
鱸魚不受寒江釣  
今夜朱磯雪滿船

即事

繁華一夕怨西風  
金鴈鈿蟬鏡影空  
咫尺關山春夢裏  
桃花又向別人紅

衡山春遊圖

鴈書不到祝融峯  
悵望蒼梧駐六龍  
尚欲暮年專一壑  
白雲深處寄行踪





學言稿卷六